

# SCRIPTA

---

**Numéro Scripta :** 1346

**Auteur(s) :** Caen (bailli)

**Bénéficiaire(s) :** Bayeux (chapitre cathédral)

**Genre d'acte :** charte

**Authenticité :** non suspect

**Datation :** 1287, 30 avril

**Lieu d'émission :** Caen

**Action juridique :** autre

**Langue du texte :** ancien français

## Analyse

Le clerc Guillaume d'Amayé, n'ayant pas payé 13 livres tournois qu'il devait au chapitre de Bayeux, le bailli de Caen donne et assigne à ce dernier des terres et des rentes, équivalant à la somme susdite, en la paroisse de Sainte-Croix-Grande-Tonne, avec tous les droits du débiteur sur les unes et les autres.

## Tableau de la tradition

### Éditions principales

a. Bourrienne Valentin (Abbé), *Antiquus cartularius ecclesiae Baiocensis (Livre noir)*, Rouen-Paris, Lestringant-Picard (Société de l'histoire de Normandie), 1902-1903, 2 vol., n° DLXXIII, t. 2, p. 330-332.

Texte établi d'après a

A touz ceuls qui ces letres verront, le baillif de Caen, saluz. Comme Guillame d'Amayé, clerc, fust obligié au chapitre de l'eglise Nostre Dame de Baiex en treze livres de Torneis, si comme il est contenu en une letre seelée deu seel de la viscontei de Baiex, sachies que nos, pour la deffaute deu paiement de la dete devant dite, avon baillié et assignié au dit chapitre, c'est assaveir quatre pièces de terre assises en terroir de Sainte Croiz de Grentonne, desqueles l'une pièce, qui contient une vergiee et demiee de terre, assise à la Rue Braouse, entre la terre Guillaume de Caron, d'une part, et la terre Johan Labbe, de l'autre part ; de rechief, une pièce, qui contient la meitié d'une vergée et demie de terre, assise à la Vée de Colomp, entre la terre as hers Raol Rogier, d'une part, et la terre Henri Maheut, de l'autre part ; item, une pièce, qui contient les treis parz d'une vergiee de terre, assise en la dele de Callouai, entre la terre au dit Guillame d'Amayé, d'une part, et la terre Thomas Beau Vallet, de l'autre part ; item, une pièce de terre, assise en la dele des Londeles, entre la terre Robert Laloignie, d'une part, et la terre Henri Veisin, de l'autre ; item, un sestier de forment, à la mesure de Sainte Croiz de Grentonne, en mois de septembre, deux gelines, deux deniers Torneis à Noel, vint oes, et deux deniers Torneis à Pasques, d'anel rente, à prendre chescun an, en quatre pièces de terre assises en dit terroir, desqueles l'une pièce, contenant une vergiee et demie de terre, est assise à la voie deu Mostier, entre la terre as hers Raol Rogier, d'une part, et la terre Renoulf de Rosel, de l'autre part ; item, une pièce, contenant une vergiee et la quarte partie d'une vergiee, est assise en la dele des Routiz, entre la terre Herneys deu Moustier, d'une part, et la terre au dit Renoulf de Rosel, de l'autre part ; item, une pièce de terre, contenant la moitié d'une vergée et demie de terre, est assise as deux Mares, entre la terre de l'aumosne Sainte Croiz de Grentonne, d'une part, et la terre monseignor Herbert d'Aigniaux, chevalier, de l'autre part ; item, une pièce, contenant la moitié d'une vergée et demie de terre, en la dele deu Sevel, entre la terre Thomas Beau Vallet, d'une part, et la terre as hers Helyes Dingye, de l'autre part : laquele terre et laquele rente devant diz nos avon fet jurer et aprésagier, par les serement de prodes hommes, pour la somme d'argent devant dite ; à

tenir, et à avoir, et apporseer, par dreit héritage, les quatre pièces de terre et la rente, chescun an as diz termes, es quatre pièces de terre devant dites, si comme eles s'estendent en lonc et en lei, o tel justice et o tel seignorie, comme le dit Guillame d'Amayé i avoit et avoir povoit au dit chapitre, ona cels qui aroient cause dels portanz ces lettres, bien et empes, sanz contredit nul. Et, en tesmoing de cen, nous avon seelé ceste letre deu seel de la baillie de Caen, annexié à la letre devant dite, sauve la dreiture le Roi et autrui. Ce fu fet en l'an de grâce mil cc. iiijxx et sept, le mercresdi devant la sainte Croiz en may.